

ՊՐՈՏՈԶՈՈԼՈԳՆԵՐԻ Յ-ՐԴ ՄԻՋԱԶԴԱՅԻՆ ԿՈՆԳՐԵՍՈՒ

1969 թ. հուլիսի 2-ից մինչև 10-ը Լենինգրադի Թավրիկյան պալատում տեղի ունեցավ պրոտոզոոլոգների 3-րդ միջազգային կոնգրեսը:

1-ին կոնգրեսը, որը կազմակերպվել էր Չեխոսլովակիայի գիտությունների ակադեմիայի և Ամերիկայի Միացյալ Նահանգների պրոտոզոոլոգների միության նախաձեռնությամբ, կայացել է 1961 թվականին Չեխոսլովակիայի մայրաքաղաք Պրագայում: Այնտեղ էլ որոշում ընդունվեց պարբերաբար (4—5 տարին մեկ) հրավիրել պրոտոզոոլոգների կոնգրես:

Այդ որոշման համաձայն 1965 թ. Լոնդոնում կայացավ 2-րդ կոնգրեսը և որոշում ընդունվեց 3-րդ կոնգրեսը հրավիրել Լենինգրադում:

Լենինգրադյան կոնգրեսի աշխատանքներն ընթացան գիտական բարձր մակարդակով և ջերմ բարեկամական մթնոլորտում: Այդ աշխատանքներին մասնակցում էին աշխարհի 36 տարբեր երկրների 641 գիտնական, որոնց թվում հայտնի գիտնականներ Պոլյանսկին, Մոշկովսկին (ՍՍՀՄ), Ժադենը (Բելգիա), Գարնհեյմը (Անգլիա), Խուլը (ԱՄՆ) և ուրիշներ:

Առանձնապես բազմամարդ էին ՍՍՀՄ-ի, ԱՄՆ-ի, Անգլիայի պատվիրակությունները: ՍՍՀՄ-ի պատվիրակությունը կազմված էր միութենական բոլոր 15 հանրապետությունների ներկայացուցիչներից:

Համեմատաբար կարճ այդ ժամանակաընթացքում լավեցին շուրջ 500 զեկուցումներ և հազորդումներ, որոնք նվիրված էին նախակենդանիների գենետիկայի, ենթակառուցվածքի, ցիտոքեմիայի, ցիտոգենետիկայի, բիոքեմիայի և այլ արդիական հարցերին:

Հայաստանի գիտնականները նույնպես հանդես եկան կոնգրեսում մի շարք հազորդումներով: Կ. Միրախլյանի, Է. Գասպարյանի (ՀՍՄՀ ԳԱ փորձառական կենսաբանության ինստիտուտ), Մ. Համբարձումյանի (Նրևանի բժշկական ինստիտուտ), Վ. Խաչոյանի (ՀՍՄՀ ԳԱ Փորձառական կենսաբանության ինստիտուտ) և ուրիշների ելույթները մեծ ուշադրությամբ լսեցին կոնգրեսի մասնակիցները:

Կոնգրեսը նշեց, որ ներկա դարը կենսաբանության դար է, քանի որ մեր օրերում բուռն կերպով ու մեծ թափով զարգանում են կենսաբանական գիտությունները, այդ թվում նաև պրոտոզոոլոգիան: Կենսաբանության այս մասնաճյուղն զբաղվում է նախակենդանիների բազմակողմանի ուսումնասիրությամբ, որոնք, ինչպես հայտնի է բջջային մակարդակի վրա գտնվող օրգանիզմներ են, և, հետևաբար, տեսական մեծ հետաքրքրություն են ներկայացնում ինչպես կենդանաբանության, այնպես էլ բջջաբանության համար: Այս գիտությունը նաև բացահայտում է բջջի էվոլյուցիոն հնարավորությունները և միաժամանակ, մարդկության համար մեծ դործնական նշանակություն ունի, քանի որ նախակենդանիներից շատերը մարդու և կենդանիների (այդ թվում ձկների ու օգտակար միջատների) բազմաթիվ հիվանդությունների հարուցիչներն են հանդիսանում:

Նախակենդանիները նաև կեր են հանդիսանում ձկների համար սրանց զարգացման որոշ փուլում և, բացի այդ, օգտագործվում են որպես ինդիկատորներ ջրավազանների մաքրության աստիճանը ուղղելու ժամանակ և որպես վնասակար միջատների ոչնչացնելու միջոցներ: Նախակենդանիների դերը մեծ է նաև երկրագնդի հողաշերտի կազմավորման պրոցեսում:

Զեկուցումների ու հազորդումների թեզիսները հրատարակվել են ռուսերեն, անգլերեն, գերմաներեն և ֆրանսերեն լեզուներով:

Կոնգրեսը որոշում ընդունեց պրոտոզոոլոգների 4-րդ միջազգային կոնգրեսը գումարել Զրանսիայում, 1973 թվականին: